

UDIN

Minorancis te Euroregjon

ESARÀ LA OCASION juste par fevelâ dal rûl des lenghis di minorance te Euroregjon l'incuintri che al varà propi chest titul e che il Comun di Udin cul assessôr pes Lenghis minoritariis Kristian Franzil, la Agenzie regionâl pe lenghe furlane e il Centri internazionâl sul plurilinguism de Universitât dal Friûl a stan inmaneat par sabide ai 31 di Otubar li de sale cunvignis dal ateneu furlan, in vie Palladio 6.

L'apontament al tacarà aes 9 e mieze di matine cul salût dal sindic dal cjâf lûc furlan Furio Honsell, po dopo l'incuintri al sarà introdusût di bande dal president de Arlef, Lorenzo Zanon. La matinade e sarà insiorade des relazions di undis rapresentants istituzionâi dal Friûl-Vignesie Julie e des minorancis di cheste aree de Europe, cjapant dentri Austrie, Slovenie, Cravuzie zontant i

ladins dolomitans. Pe Zonte regionâl e cjararà la peraule la assessore aes Relazions internazionâls e comunitariis, Federica Seganti, che e fevelarà dal moment che e sta traviersant il progjet de Euroregjon e soreddut dal so avignî. Tant che rapresentants de universitât furlane i tocjarà ae professore Fabiana Fusco dal Centri internazionâl sul plurilinguism e al docent dal stes ateneu Guglielmo Cevolin, che al larà insot frontant il stât juridic dai grups minoritaris de Euroregjon.

Par fâ un quadri legislatif de situazion de minorance taliane che e vîf in Istrie, Cuarnâr, Dalmazie e Slavonie a intervignaran il president de Union taliane Maurizio Tremul e l'esponent de comunitât di Pole Vito Paoletič. A saran presints a Udin ancje rapresentants dai slovens che a vîvin in Carinzie:



La sale cunvignis dal ateneu di Udin e darà acet a un incuintri su lis lenghis di minorance te Euroregjon.

Marjan Sturm, president de associazion che e ten adun lis sociis slovenis presintis in Austrie, e Štefka Vavti dal Istitût Slowenisches Wissenschaftliches. Ae cunvigne a daran il lôr contribût ancje Milan Bufon, president dal Istitût sloven di ricercje cun sede a Triest, e Vella Plozner, operadore culturâl e membri de Comission con-

sultive pe minorance gjerma-nofone dal Friûl. A intervignî al sarà ancje Marco Stolfo pe Regjon, mintri che pe Union generela di Ladins dles Dolomites e cjararà la peraule la presidente Elsa Zardini.

Dilunc de cunvigne a fâ di moderadôr al sarà Carli Pup, puartevoûs dal Comitât 482.

ALESSIO POTOCO